

Naqqiut
Saqqummiussissut 27. februar 2026-meersoq taarserpaa
(Naalakkersuisuni akisussaaffiit allanngortinneqarnerisa kingunerisaanik
aaqqiisoqarpoq)

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarneri pillugit inatsit (Pisortani sulisunut kissaatigineqanngitsumik, innarliisumik nikanarsaasumillu pissusilersornerup pinerluutinngortinneqarnera, inuit atonerlunneqarnerisa pinerluutinngortinneqarnerat, kinguaassiuutinut tunngasumik atortussat innarliissutaasut akiorniarlugit suliniutit patajaallisarneqarnerat, pineqaatissiinerup aalajangersarneqarnerani pissutsit sukannernerulersitsisut, toqutsisutut eqqartuussaasimasut immikkoortortaqarfimmi matoqqasumi pineqaatissinneqarnermik naammassineqarnissaannut inissinneqartarnerat il.il.) pillugu siunnersuutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut (Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerinnineq

Inatsisit atuutsinneqarnerannut suliassaqrifiup killiffinnut, Kalaallit Nunaanni kissaatigisatsinnut, qaffatsinneqarnissaa pillugu qallunaat naalakkersuisuinit Naalakkersuisut kissaateqartarnerisa, inatsisissatut siunnersuut manna kinguneraa. Taamaalilluni aalajangersakkanik arlalinnik, Naalakkersuisut Inatsiseqarnermut ministereqarfimmut ukiumoortumik suliassani pingaarnersiugaanni ilaasimasunik, inatsisissatut siunnersuut imaqrpoq, aamma taakku massakut pinerluttulerinermi inatsisip allanngortinneqarneranut tunngaviupput.

Tamatuma saniatigut oqaatsitigut naleqqussaanernik aamma arlalinnik inatsisissatut siunnersuut imaqrpoq, taakkulu Kalaallit Nunaanni Pinerluttunik Isumaginnittoqrifiup aqqata Kalaallit Nunaanni Parnaarussiveqarfimmut, qallunaatut Grønlands Fængsler-inngortup, allanngortinneqarnerata kinguneraa. Tassunga atatillugu taaguutip “inissiisarfiup” qimanneqarnissaa aamma tassunga taarsiullugu taaguutip ullutsinnut naleqqunnerusup “parnaarussiviup” pinerluttulerinermi- aamma eqqartuussisarnermik inatsimmi atorneqarnissaat, Naalakkersuisut kissaatigisimavaat.

Allanngortitsinerit katillugit 14-iupput, uanilu taamaallaat tigullattaakkat taassavakka:

Nutaatut, nalinginnaasumik sulisaatsimi kiffimmit qaffasinnerusumut eqqartuussiviit pineqaatissiinermik sukannernerulersitsisinnaaneranik kinguneqarsinnaasumik, pissutsit assigiinngitsut pillugit immikkut ittumik aalajangersakkamik ilanngussisoqarpoq. Pissutsit suut pineqaatissiinerup aalajangersarneqarnerani pingaaruteqarsimanersut, eqqartuussisut aalajangiinerminni taassagaat, tamatuma kinguneraa, aamma taamaalilluni avataaniittunit suut pingartinneqarsimanersut paasiuminarnerulissapput. Pissutsit assigiinngitsut, sulisaatsimut nalinginnaasumut naleqqiullugit pineqaatissiinermik qaffasinnerusumik pissutissaqartitsisinnaasoq assersuutigalugu tassaavoq, aaqqissuussaasumik pinerluttuliornerit, ikiaroonartut anngiortumik eqqunneqarnerannut aamma tuniniarneqarnerannut atatillugu annertunerujartortumik takusalikkatta pineqarnerat.

Pissutsit assigiinngitsut sukannernerulersitsisut ilaat alla tassaasinnaavoq, pinerluttuliorneq allat immikkut inuiaassusaannik, upperisaannik, innarluuteqarnerannik, suaassutsimik kajungerfigisaannik, suaassutsikkut kinaassusaannik, suaassutsikkut ilisarnaataanik imaluunniit suaassutsip ilisarnaataanik takutitaanik tunngaveqartoq. Taanna ulluinnarni “qinngarsuilluni pinerlunnernik” taasarparput.

Pissutsit assigiinngitsut sukannernerulersitsisut taakku 15-it saniatigut, inatsisissatut siunnersuut inunnik atornerluineq pillugu aalajangersakkamik, pisortani sulisunut kissaatigineqanngitsumik, innarliisumik nikanarsaasumillu pissusilersornerup pinerluutinngortinneqarnera pillugu aalajangersakkamik aamma kinguaassiuutinut tunngasumik atortussat innarliissutaasut akiorniarlugit suliniutit patajaallisarneqarnerat aamma inuit LGBTI-jusut aamma inuit innarluutillit immikkoortinneqartarnerisa akiorneqarnissaannut illersuinerup patajaallisarneqarnissaannik, inatsisissatut siunnersuut imaqarpoq.

Naggataagut, ullumikkutut immikkoortorta qarfimmi ammasumi pinani, toqutsisimasutut eqqartuussaasut immikkoortorta qarfimmi matoqqasumi pillaatisiainnik atuinermik aallartitsinissaannik periarfissiisumik, siunnersuut aalajangersakkamik imaqarpoq. Massakkut Nuummi immikkoortorta qarfimmik matoqassasumik peqarnera, aamma ukiuni aggersuni parnaarussivinni inissat, ammasut aamma matoqqasut, pilersinneqartussaannerat, tunngavigalugit kissaat taanna Naalakkersuisut saqqummiussimavaat. Siliani ilungersunarnerpaami innuttaasut inatsisitigut naapertuilluartoqarneranik misigisimanagerat suliniutip taassuma qulakkeerinniffigeqatiginiartussaavaa. Piffissaq ungasinnerusoq eqqarsaatigalugu, pinerluutit ilungersunartut allat aamma aalajangersakkami ilaatinneqarsinnaanissaat kissaataavoq.

Taamatut oqaaseqarlutik Naalakkersuisut immikkoortoq Inatsisartuni suliarineqartussanngortippaat.